

# Vischnaunca Ruschein

## Lescha da scola

Questa lescha se basa sin art. 50 dalla lescha cantunala da scola e sin la constituziun communal da Ruschein (art. 54-57).

### Art. 1 Sereferescha

Persunas, uffecis e funcziuns en quella lescha serefereschan sin omisduas schlattainas.

## Reglaments generals

### Art. 2 Promover

La scola publica sustegn ils geniturs ell'educaziun da lur affons. Plinavon duein quels vegnir educai ad in saun patertgar e demanar e mess sin buna via per igl avegnir. La scola promova capientscha e responsabladad viers sesez e concarstgaun, cuminonza ed ambient.

### Art. 3 Partiziuns

La vischnaunca meina las suandontas partiziuns da scola:

- a) Scoletta
- b) Scola primara
- c) Scola secundara, scola reala, classas pintgas
- d) Classa pintga integrada (rev. 09.06.2006)

Las partiziuns sut punct c vegnan menadas entras il consorzi da scola Glion e contuorn.

### Art. 4 Cuoz

- a) 9 onns da scola ein obligatoris. Il temps da scola per onn munta a 38 jamnas effectivas.
- b) Per il 10-avel onn da scola sco era partenent il terminar la scola pli baul ch'usitau ei la lescha da scola cantunala (art. 12 alinea 2) ligionta. (rev. 23.11.2000)
- c) La sonda vala sco di liber (jamna de 5 dis). (rev. 23.11.2000)

### Art. 5 Entschatta

Igl onn da scola entscheiva mintgamai suenter las vacanzas da stad (ca. miez uost).

### Art. 6 Firaus e dis libers

- a) Daniev, ils 2 da schaner, S. Giusep, Venderdis Sogn, Sonda Sontga, Gliendisdis Pastgas, Anceinza, Sontgilcrest, Gliendisdis Tschuncheismas, Numna Sontga, Vigelgia da Nadal suentermiezdi, Nadal e S.Stiafen

- b) Per prolungir ed anticipar las vacanzas dat ei negina lubientscha; quei vul dir, ch'ei vegn buca concediu dis libers avon e suenter las vacanzas.

### **Art. 7 Absenzas**

Sco motivs d'absenza valan en special:

1. Accident e malsogna dil scolar, event. dils geniturs
2. Malsognas infectusas da persunas en famiglia e da conhabitonts
3. Mortori d'ina persuna en famiglia ni da tierparents
4. Sto l'instrucziun vegnir tralascada ord auters motivs, ei la damonda da far en scret gia ordavon.

Il motiv d'absenza sto vegnir annunziaus al scolast. Vegn quei tralascchau, san ils geniturs vegnir puni tenor art. 55 dalla lescha da scola cantunala.

### **Art. 8 Survigilanza**

Il scolaesser vegn survegliaus dil cussegl da scola, digl inspectur, dalla cumissiun e dil departament d'educaziun sco era dalla Regenza cantunala.

Ils scolars stattan sut survegilanza dil scolast. Tuts discuors denter geniturs, resp. lur substituents, e scolast appartenent il scolaesser ein da far ordeifer il temps da scola.

Damondas che stattan en connex cul menaschi da scola ein causa dil cussegl da scola.

Ils geniturs ni lur substituents han il dretg da contactar il cussegl da scola a scret, sch'ei dat negina cunvegnientscha cul scolast.

### **Art. 9 Recuors**

Encunter decisziuns e disposiziuns dil cussegl da scola partenent fatgs da scola san ils pertuccai recuorer enteifer 30 dis tier il departament d'educaziun cantunal, en cass che la lescha da scola prescriba buca zatgei auter.

## **Cussegl da scola**

### **Art. 10 Elecziuns**

- a) Il cussegl da scola secumpona da 5 commembers.

La radunonza generala da vischnaunca elegia tenor constituziun communal 3 commembers ed 1 substitut. Plinavon deleghescha la suprastanza in gerau per fatgs da scola.

- b) La vischnaunca da Ladir elegia 1 commember sco era 1 substitut.

- c) Il cussegl da scola seconstituescha sesez.

### **Art. 11 Dretgs e duers**

Il cussegl da scola procura che las leschas da scola dalla confederaziun, dil cantun sco era dalla vischnaunca vegnien applicadas.

El ha aunc suandontas incumbensas:

1. Encurir e far proposta per mauns dalla suprastanza communal per eleger, reeleger (mintga 2 onns) ni relaschar ils scolasts (rev. 23.11.2000)
2. Fixar ils datums per l'entschatta e la fin dalla scola e per las vacanzas sco era ils dis libers tenor dretg cantunal (rev. 23.11.2000)

3. Il cussegl da scola approbescha ils uraris da scola, lubescha dis da sport e cultura sin proposta dils scolasts.
4. El fixescha dis da viseta sco era autras occasiuns che promovon il contact denter ils geniturs e la scola.
5. El procura per bien manteniment dallas localitads da scola e per mieds d'instrucziun.
6. Tschercar e far proposta alla suprastanza communal per eleger il miedi ed il dentist da scola (rev. 23.11.2000)
7. Organisar il survetsch medicinal e dental (rev. 23.11.2000)
8. Conceder als scolasts dis da congedi per conferenzas, cuors ed autras activitads durant il temps da scola tenor recumandaziuns dil departament d'educaziun cantunal (rev. 23.11.2000)
9. Tractar grevs cass da disciplina e cass penals conform alla procedura penala cantunala, plinavon dar castitgs per absenzas da scola tenor art. 55 dalla lescha da scola cantunala
10. Lubientschas da congedi per scolars naven da 4 - 15 dis ad onn e lubientschas extraordinarias
11. Preparar la lescha da scola per mauns dalla suprastanza communal (rev. 23.11.2000)
12. Decretar in uorden da scola, da disciplina sco era in uorden da promoziun (uorden da promoziun tenor lescha cantunala)
13. Fixar incumbensas specialas per ils scolasts en connex cun igl uorden dil me-naschi da scola
14. Il cussegl tracta discretamein tut ils cass che stattan en connex cun la scola.
15. Il cussegl da scola assista 2 tochen 4 gadas ad onn a l'instrucziun e sediscuora culs scolasts per far in maletg dalla situaziun actuala en scola. El promova e sustegn il scolast en sia lavur.

## **Art.12 Finanzas**

Per la cumpra da mieds d'instrucziun, per material d'instrucziun intuitiva ed ulteriur material da scola dispona il cussegl da scola d'ina summa annuala, fixada dalla suprastanza communal tenor stipulaziun en la constituziun communal. (rev. 23.11.2000)

## **Art.13 Protocol**

Dallas sesidas dil cussegl vegn mintgamai menau in protocol. La proxima sesida vegn el approbaus. Suentar l'approbaziun ei de consignar ina copia dil protocol alla canzlia communal. (rev. 23.11.2000)

## **Art. 14 Conclus**

Conclus dil cussegl da scola ein valeivels, sche silmeins 3 commembers da quel ein presents.

## **President dil cussegl da scola**

## **Art. 15 Incumbensas**

1. Organisar las sesidas dil cussegl da scola tenor basegns ni sin giavisch da 3 commembers da quel.

2. El prepara il pensum dil cussegl da scola e mira ch'ils conclus vegnien exequi.
3. El representa il cussegl da scola anoviars.
4. El survigilescha:
  - a) la repartiziun dallas classas
  - b) il fixar ils uraris e las lecziuns da scola (termin: 1. d'uost)
  - c) igl entir menaschi da scola
5. El dat en cass urgents lubientscha da congedi als scolars per tochen 3 dis ad onn da scola. (rev. 23.11.2000)
6. El meina discuors dalla reelecziun dils scolasts (termin: sil pli tard mintgamai ils 15 da schaner).
7. El interquera cass disciplinars, sa denton delegar tals ad in auter commember dil cussegl da scola.
8. El meina tut la corrispondenza dil cussegl da scola.
9. El survigilescha il credit per mieds e material da scola, visescha ils quens.
10. Preparar il cudisch da menaschi annual
11. Survigilanza schebein las lecziuns vegnan exequidas tenor plan d'instrucziun

## Scolasts

### Art. 16 Nominaziun, lavur accessoria

Ils scolasts vegnan mintgamai elegi per dus onns. Vegnan els reelegi, sto quei succeder avon la fin da fevrer. Vegnan els buca reelegi, ston ei vegnir informai a scret tochen la fin da fevrer.

Las condiziuns dallas plazzas dils scolasts ein reglamentadas ella lescha cantunala, en quella da vischnaunca sco era egl uorden da scola. Igl emprem onn da scola vala sco onn d'emprova.

Ils scolasts ston ni san mintgamai midar lur scalem d'instrucziun, sch'il cussegl da scola ei en cunvegnientscha cugl inspectur dil meini, che quei surveschi al beinstar dalla scola.

Il cussegl da scola sa schar assister allas sedutas scolasts, quei cun vusch consultativa.

Lavurs accessorias ni uffecis basegnan la lubientscha dil cussegl da scola e san vegnir concedi mo sche l'instrucziun pitescha buca giudlunder.

### Art. 17 Cumpetenzas ed obligaziuns

Ils scolasts han d'ademplier las obligaziuns tenor la lescha da scola cantunala e tenor la lescha da scola dalla vischnaunca.

1. Sriver ils attestats. Ei la promoziun periclitada, ston ils geniturs vegnir avisai en scret 3 meins avon la finiziun dalla scola.
2. Fixar ils uraris. Las lecziuns ston mintgamai vegnir repartidas ulivamein sin tut ils dis da scola, e quei en favur dils scolars e dalla scola.
3. Tgitar il contact culs geniturs e cul cussegl da scola
4. Tractar levs cass disciplinars
5. Dar en cass urgents lubientscha da congedi a scolars per 1 di ad onn, sclaus da quei dretg ein ils dis avon e suenter las vacanzas (rev. 23.11.2000)
6. Ademplier incumbensas specialas surdadas dil cussegl da scola

7. Els han l'obligaziun da procurar, ch'ils reglaments che stattan sut lur survegionza vegnien exequi.
8. L'instrucziun en la 5-avla e 6-avla classa sto succeder aschia, che las pretensiuns dalla midada el scalem ault a Glion vegnien risguardadas.
9. Ils scolasts ein mintgamai presents 5 minutas avon e sunter scola sigl areal da scola.
10. Mintgamai ina gada ad onn ei mintga scolast obligaus d'organisar ina sera da geniturs.

## Directivas generalas

### Art. 18 Segiradas

Segiradas dil scolaesser ei caussa da vischnaunca.

Ils affons ein segirai entras la segirada da scola duront scola, il viadi a scola e re-tuorn a casa.

### Art. 19 Transports

Organisaziun da transports dil scolaesser ei caussa dil cussegl da scola en cun-vegnientscha cun la suprastanza communal. (rev. 23.11.2000)

### Art. 20 Definiziun

Per tut quei ch'ei buca definiu en questa lescha, vala la lescha da scola cantunala.

### Art. 21 Approbaziun

Questa lescha da scola va en vigur cun l'approbaziun tras la radunonza communal ed il Departament d'educaziun, cultura e protecziun digl ambient cantunal. Ella remplazza la lescha dils 23.11.89.

Concludiu dalla radunonza communal da calonda mars dils 15.4.1997/  
revediu ils 23.11.2000 / revediu ils 09.06.2006

#### Per la vischnaunca:

Il president:

#### Per il cussegl da scola:

Il president:

Igl actuar: